

Q. D. B. V.

DISSERTATIO INAUGVRALIS MEDICA
DE

TENESMO,

RECTORE MAGNIFICENTISSIMO,
SERENISSIMO PRINCIPE AC DOMINO,
D O M I N O

GVILIELMO HENRICO,

DVCE SAXONIÆ, IVLIACI, CLIVIÆ, MONTIVM,
ANGARIÆ ET WESTPHALIÆ, & reliqua,

SVB PRÆSIDIO

GEORGII WOLFFGANGI WEDELII,

HEREDITARII in Schwarza/

MEDICINÆ DOCTORIS, COMITIS PALATINI CÆSAREI,
SERENISSIMORVM SAXONIÆ DVCVM CONSILIARII
ET ARCHIATRI,

THEORETICES PROFESSORIS PVBLICI ORDINARII,

*Patroni, Præceptoris ac Hospitis omni honoris cultu ac fi-
liali obseruantia etatem prosequendi,*

PRO LICENTIA

Summos in Arte Medica Honores, Insignia & Priuilegia DOCTO-
RALIA, MORE MAIORVM, rite capeffendi,
publicæ disquisitioni exposita

MATTHIA ZACHARIA PILLINGIO,

ALTENBURGENSI MISNICO,

IN AUDITORIO MAIORI,


Horis ante- & pomeridianis consuetis,

A. D. Octobr. A. C. M DCC X.

IENÆ, Litteris KREBSIANIS.

I. N. I.

P R O O E M I V M.

 Vlgata est parcœmia, voluntas non potest cogi. Dubia hæc est, prout vel morali vel physica acceptione profertur.

Verum est, aliter persuasum & obstinatum animum ægre posse cogi, vti sunt homines vel serui natura quasi, vel appetitus magis sensitiui, quam rationalis dicto audientes.

Contra ea vero non pauca sunt media, quibus voluntas cogi potest, vel duro necessitatis telo cogente, vel frustra obnitente etiam sensibus ipsis animo. Voluntas sæpe hominum est mutabilis, neque enim Stoica quicquam valet phantasia in contrarium, nil quicquam debere obstare ad flectendum animum, seu gratum alias, seu hosticum visum.


In morbis vel soli dolores tortores sunt, qui in obsequium trahunt inuitos, vt voluntate coacti sua obniti & certare desinant flexili satis rigiditate.

Docet sane coacta naturæ œconomia, quid de eo sentiendum sit. Tenemus exemplo sit, (ne de tetano eiusque speciebus aliisque dicamus,) quid sit, quidue possit coactum & expressum opus, vt *Tulliana* phrasi loquamur. De illo dum dicere aggredimur, diuinum adoramus Numen, vt feliciter id euenire clementer iubeat.

CAPVT I.

De

Definitione Nominali & Reali.

Um enucleationem & cognitionem nominis ipsius rei perceptio sequatur, & conuenienter nomina τὰ τῶν ὄντων νοήματα, rerum notiones, salutari soleant, operæ pretium, imo vtile, non minus ac necessarium est, etiam ONOMATOLOGIAM delibare, nec intactam relinquere.

Receptissimum nomen est TENESMVS in Latio, vel *Cornelii Nepotis* autoritate, sed ab Hellade oriundum, vnde & *Celsus* magis Græco nomine τενεσμὸν efferre voluit. Si vero antiquos Græcos, imprimis patres medicinæ, consulamus, vt *Hippocratem* ipsum, & *Pergamenum*, aliosque Græcos, quotiescunque illius mentionem faciunt, τενεσμός audit rectius: τενεσμὸν vero apud Græcos vix legas, quod perperam quidam scribunt.

Sunt, qui etiam apud *Plinium* & alios tenasmon legunt, sed accuratiores & genuinæ lectiones tenesmi vocem longe rectius & constanter scriptam asserunt; Idem de tinesmo valet, quo pacto non temere efferenda est.

Explicat hoc nomen satis emphatice ipsa deriuatio, siquidem oritur & dicitur ἀπὸ τῆς τείνειν tendere, intendere, extendere, produci. Adeoque, elogio *Galen* l. 2. meth. med. c. 2. & 7. aphor. comm. 27. ὀνόμασαι τὸ πάθος ἀπὸ τῆς τάσεως φάσι τῆς ἡνωμένης κατ' αὐτήν. Nomen accepit hic affectus ab illa, quæ in eo fit, tensione. Et *Actuar.* l. de diagnos. morb. c. 41. scribit: τενεσμός τὸ πάθος λέγει, τὴν ἑμὲρον ὁ πέπονθεν, ἐκτείνεσαι. *Tenesmus* affectus hic nominatur eo, quod locus affectus extenditur.

ditur. Hinc idem notat, ac si dicas, iuxta *Scholasten Nicandri*, *Ἀνάστροφος distensio*, iuxta alios tensio, intensio.

Nec de nihilo erit synonyma quædam nostri affectus libare, qui dicitur perfrictio ani *Marcello l. de medicam. c. 29.* libido defurgendi seu appetitus, *Scribonio Largo*, cupiditas desidendi aliis, *Plinio Secundo l. 2. c. 28.* conatus vacuus & molestus, pruritus ani. Græce illa *Ἀνάστροφος*, *distensio*, eleganter *βίαιος* laudato *Scholasta Nicandri* audit, violatio seu coactio potius, vt Germanis das nöthigen zum Stuhl/ die Stuhl-Sucht / der Zwang / der Stuhl-Zwang / das Zwengen. Gallis, vt *Pineto* in versione *Plinii* Gallica satis apte dicitur passim *l' expression*.

Vtut vero prædicetur aliquando etiam tenesmus de dysenteria, & confundatur cum eadem, quod, *Celsi* elogio, de iiciendi cupiditas dolorque in ano vtrique tribuatur; possunt tamen & solent hæc separari quoque, nec promiscue sunt sumenda. Idem de hæmorrhoidibus, cæcis præsertim, aliisque tensionibus ani dolorificis dictum esto.

TENESMVS ergo est frequens desidendi cupiditas, cum nisu & conatu fere inani & molesto, ab irritatione sphincteris ani continuata exoriens.

GENVS seu rationem formalem consistere in *ωεξυμία*, seu cupiditate quadam, confirmat *Galenus in finit. Med. & 7. apb. comm. 27.* ipseque *Celsus* ita definit *l. 4. c. 18.* ac plerique veteres æque ac recentiores, *Paulus, Aetius, Aretæus, Sennertus* aliique.

Cupiditas hæc definita est & debita voluntati, seu appetitui sensitivo. Cumque hic locomotiuam impellat, & sensus inuitet ac præcedat motum, hinc cupiditas est prior, conatus sequitur, excretioni intentus, seu *ἐξανάστροφος*, *consurrectio*, vt satisfiat sensui & stimulo.

Hinc alii quidam id exprimere maluerunt, per appetitum tenesimum definientes, non alio sensu intelligendi; alii per desiderium, per voluptatem & vrgentiam quoque ipsam. Ne dicamus causalem quosdam amplexos definitionem, esse scilicet irritationem intestini recti, vt *Scribon. Largus l. de comp. medicam c. 37.* Ne illos laudemus, qui remotum nominant genus, a subiecto desumptum, & vocant affectum intestini recti, quem comitatur conatus, vti *Trallianus*; alii *Ἀσθένειαν dispositionem*, vt ipse *Galenus l. c.*

DIFFERENTIA ergo SPECIFICA limitat hanc cupiditatem, quæ egerendi est, & deponendi alium. Confirmat idem intellectus & appetitus consideratio & commercium, respectu obiecti, tum cognoscendi, tum appetendi seu excernendi, sed sensuali solum vtrumque.

Adeoque cupiditas paulo *ἀνύγως* occurrit, & exercetur ratione tantum boni apparentis, quia natura per deiectionem leuamen quoddam intendit, quod licet ad breue tempus etiam inuenire videatur, est tamen id magis mendosum & cum augmento sæpe mali.

Frequens & continua quasi est hæc egerendi cupiditas, & conatus assiduus, ad differentiam conatum naturalium, quoniam in tenesmo conatus conatum excipit. Cum enim contra ea in naturali illa ad desidendum iteratione, non leue intercedat interuallum, vt per diem & noctem vix semel iterumque admoneat ianitor, præsto esse quæ exitum desiderant, hoc casu crebrius & citra moram debitam existimatur archeus, breui satis temporis spatio liber.

Inanis autem hic est conatus, i. e. sine effectû, sine causa, ex mente *Scribonii Largi*, seu suo sensu sine materia, saltem sufficiente & proportionata, quo differt ab omnibus fluxionibus alui, in quibus modo cum, modo sine conatu mul-

tum

tum materiæ excernitur, quod in tenesmo cessat, neque enim ἀξιον λόγῳ, memoratu dignum excernitur, mouetur incassum, non promouet alius. Vana est & sine viribus hæc urgentia, nisus, impetus, promptitudo.

Inanis præterea dicitur non tam respectu excernendorum qualitatis, quam quantitatis, non tam molis, quam urgentiæ. Molesta insuper satis est, utpote irrequieta, inuita, imo non raro dolorifica, irrita conatu producta.

Et omnis hic conatus per anum peragitur, καὶ τὸ directus, ad differentiam nausæ, per os superius se exerentis. Hinc non inepte duplici mechanica notio tenesmi generalis concipi & exprimi analogice potest, nausæ laudatæ & stranguariæ. Seu quicquid per os est nausea, quæ apud *Aretæum* vocatur conatus ad vomendum perpetuus & inanis, id per anum certo respectu est tenesmus, quatenus & ibi tunc quædam occurrit ναυσίωσις ad deplendum, sed frustranea magis. Sic & curatius adhuc in tenesmo similiter ani sphincter laborat, ut vesicæ in stranguria, quo de vid. *Duretus comm. in Coac. p. 364.*

Est itaque hoc symptoma excretorum & retentorum, a potiori facta denominatione, & quidem in actu exercito, ut id huc applicemus, unde quidam fluxum intestinale vocant quoque; sicut in actu signato concurrit, ob sororium commercium, actio læsa quoque, quoad motum naturæ coactæ.

Notabile enim hic est, olim quoque quosdam tenesmum ad lentericiæ species retulisse, quod nominatim ex *Erasistrati l. 2. de ventriculo* citat *Galenus 6. aph. comm. 1.* diuississe nempe illum eandem in proprie dictam, dysenteriam, & tenesmum, quando biliosa mixta cum sanguinolentis, atque mucosis excernantur, sed & ipse eundem fusius refutat, neque alios habuit assentientes.

CA.

CAPVT II.

De

Subiecto.

Roximum est, vt cognita definitione, explicationem SVBIECTI aggrediamur. Facilius enim, effato *Celsi* l. 4. c. 1. omnium interiorum morbi curationesque in notitiam veniunt, si prius eorum sedes nouerimus.

Enimuero non sufficit, quod omnino habet locum quoque, nosse subiectum *vt quod*, hominem puta, vel totum corpus suo modo ipsum, sed etiam subiectum *vt quo* scire oportet. Et hoc iterum non tam quoad integram quasi machinam humanam, quam, cum omnes & singulae partes habeant suam *περίεξιν*, & quaelibet patiantur etiam suos males, distincte magis & specialius omnino.

Cum itaque tenemus consistat velut in sede, duplici sensu, locali & nominali ipso, & certa parte, nominatim circa anum eiusque sphaeram & confinia, & valeat quoque hic, vbi dolor, vel molestia, sensus & motus, ibi morbus, merito ex hoc fundamento iudicandum est de subiecto, seu parte affecta & patiente.

SVBIECTVM hinc PRINCIPALE est sphincter ani, seu musculus constrictorius, crispatus, orbicularis, qui respectu *intestinarum* quidem, deorsum vehiculantium, eorundem est finis & ultimus, quatenus illic appellant excernenda scybala, & cum his alia quaecunque dimittenda; sed respectu huius *sensus & directionis* ultimae primus. Hinc rectissime ab *Hippocrate* dicitur a colo oriundus *δεχὸς λοίωδι*, σάγμα πολυπλήθεια ἔχων, ἐς ἀκρὸν δακτυλὶς τελευτῶν, *rectum ac princeps intestinum postre-*
mum,

num, carnem copiosam habens, & in summum anum, tanquam annulum, (sphincterem) desinens. l. de anat. c. 3. t. 15.

SVBIECTVM ADÆQVATVM est ἀπευθυσμένον ἑντερον, vel etiam absolute, absque additamento hoc, dictum, q. d. dirigens & disponens, *intestinum rectum*, quod in linea recta magis deorsum fertur, pro actione sua & officio debito varie instructum.

Gaudet hoc tunicis tribus vel quatuor, vt reliquæ serpentinae quoque continuatae, vna communi, extima, a peritonæo oriunda, membranea illa, reliquis propriis magis, fibrosa, nervosa, & ab aliquibus seorsim addita, intertexta quasi magis, glandulosa, ad fœnerandam mucilaginem defensuam & oblinentem.

Exerit hic se inprimis elater peristalticus, quatenus scybala grossiora coæquata complectitur, circumprimit, blandeque sic contactu suo promouet: & sic absolutorius actus, qui excretorius scilicet est, committitur sphincteri.

Eleganter complectitur ambitum & exitum, vnaque sic seorsim & præcipue musculosam substantiam, quæ in vniuerso reliquo peristromate non inuenitur. Hæc ipsa enim musculosa substantia & crispatura a reliquis omnibus distincta gaudet prærogatiua.

Adest enim musculus ab usu sphincter dictus, orbiculus minimus, quando silet & quiescit, sed capax & magnus sic satis, si diducatur & operetur, ad officium referendæ portæ sollicitatus. Artificiosissima enim crispatura illigantur fibræ, vt instar orificii marsupii cuiusdam coarctari & dilatari per vices queat. Dilatatur a pondere, quod circumplectitur elater, constringitur mox sponte ab eodem dimisso, & depleto spatio subsidente.

Est idem delicatissimi sensus, nervi enim quatuor, effato *Th. Bartholini*, intestini recti extremo inferuntur, qui hoc ipsum valde sensibile reddunt, ut vel in tenesmo hoc videre est, *l. 1. anat. reform. c. 10. p. 97.*

Orbicularis est ad servandam æqualitatem centram, qua maxime fibræ gaudent, lateraliter vero duo levatores sursum retractum & occlusionem quoque suo modo iuvant. Cæterum arcta connexione gaudet cum cervice vesicæ non minus, quam ipsius uteri in foeminis, quod vel ideo notatu dignum est quoque, quoniam horum consensu etiam laudandus erit tenesmus non raro oriundus.

Cum itaque sphincter ani laudatus, utpote ianitor hoc loco ordinarius, primas teneat partes in sustinendo & exhibendo tenesmo, utpote animali, & sic voluntariæ, illi apertioni, deductioni, dimissioni & occlusioni consequenti velificans, operans & destinatus, quomodo hoc patiatur, considerari meretur.

Sine dubio afficitur tertia intimior vel ipsa quoque media tunica, fibris motricibus intertexta, sensilis & eminens utraque. Et patitur hinc intestinum partim ut simile, intemperata illa v.g. reddita, nudata & priuata sua debita roborante & demulcente roscida humiditate, quo de in causis agendum erit; partim ut organicum, constrictioni, complexui & circumpressioni peristalticæ velificans; & denique ut unum, continuitate sua gaudens in statu sano, unde alacriter & sine ulla molestia, dolore, sensu tristi, munere hoc suo fungitur. Secus fit a causis morboſis ipsum impetentibus & fatigantibus.

Liceat hic statuere usum auctum, qui terminus alias in scholis medicis de actione cordis, seu pulsu, prædicari consuevit, celeri vel frequenti quoque, etiam hic occurrere & applicari posse. Inde enim velut fatigato tam strenuo & generoso

neroso artifice, portæ patulæ huic & exituræ præfecto, idem sensus & motus fit deprauatus, non tam ratione sensationis, quam ratione obiecti peregrini extranei, inæqualis, insoliti, vno verbo dolorificus & molestus.

Duplici modo afficitur intestinum rectum, eiusque sphincter, ad instar aliorum morborum, in tenesmo, per *essentiam* & per *consensum*. Prius contingit, quando morbum & causam morbi proximam ita in sinu suo fouet, vt domestica sit, eique propria, nulla vero alia pars concurrat, seu causam vel materiam illuc mittat. Et hoc sensu accipiendus est *actuarius l. 1. de prognosi morborum, si vitium*, scribens, *est in intestino recto, τενεσμός* appellatur, eo, quod locus affectus *τελευται, i. e. extenditur*.

Per consensum vero patitur, quando focus morbi in alia hæret parte, & sic aliunde huc amandatur, item quando non simplex est tenesmus, sed combinatus cum alio quocunque. Perinde est, si distinguamus inter *primarium* & *secundarium*, illum vocando, quando sibi relictus est: secundarium, quando dependens, per *κοινωνίαν* seu communionem aliunde huc deriuatus, vt vesica, vtero, aliisque visceribus.


Sunt, qui illum *verum* vocant, qui scilicet causam in recto intestino affixam tenet, hunc *mendosum*, vbi causa non est fixa, sed aliunde veniens, sicuti materia fluens per intestina ad anum. Vid. *Bachanell. de consensu Med. p. 730.*

SVBIECTVM SECVNDARIVM, seu remotum magis & indirectum, dici possunt illæ partes, quæ in naturali etiam conatu alui exonerandæ cooperantur, ne dicamus, compatiuntur.

CAPVT III.

De

Causis.

um alui excretio naturaliter se habens vnice ad egerendum faciat, sitque actio animalis, substrata eadem & supposita naturali, sensu & motu absoluenda, eaque interpolata, scybalorum inutilium & recrementorum, fiatque cum *ευφορία*, de causis iam tenesmi agendum venit, vbi hæc ipsa vitiose & deprauate fiunt.

Cumque notanter in talibus actionibus sensus præcedat motum, tanquam indicans, & sic accedat ad motum inferendum voluntas, locomotivæ præses & director, aurigantibus organis cuique actioni velificantibus, commodissimam sequimur merito methodum hæc facillime concipiendi, iuxta causarum ordinem in scholis medicis receptam.

CAUSA PROXIMA & IMMEDIATA est irritatio sphincteris ani continuata. Hoc ipso termino irritationis exprimi solent vñtatissime actus naturæ coactæ; vt vero melius eiusdem ratio pateat, operæ pretium fore videtur, si quædam de ea delibemus etiam hoc loco.

Nil aliud enim dicit, quam sensum ad motum citantem & consequenter citatum. Citans est particulare in loco affecto, citatus sensus communis totius, tactus puta, intellectus & voluntas etiam suo loco explorator optimus. Hinc statim constare potest, eodem sensu, & quidem non inepte dici, archeum irritatum causam hanc subire, tum particularem scilicet, tum vniuersalem.

Sin phrasi veteribus consueta vti velimus, dicenda fuerit

rit facultas expultrix irritata, etiam hoc loco accusanda & laudanda. Idem enim reuera, imo fere aptius, specialius & conuenientius in concreto sumpta exprimit, quam vel naturæ, vel archei nomen, complexa eadem satis concinne a potiori spiritum motorem.

Testatur id ipse sensus ægrotantium, & satis laudata urgentia, conatusque indictus. Ast elegans nomen occurrit apud *Pergamenum* huius irritationis, quod & spirituosum & solidum & fluidum concursum eximie complectitur, vna voce rem ipsam determinans fere penitus: ἑλκωσις dicitur, quasi *ulceratio*.

Hanc si inuestigemus, non tam pro vlcere facto eoque indolente sic accipienda est, vnde qui vlcus intestinorum pro causa dysenterix, seu intestini recti pro causa tenesmi sumunt, hoc sano sensu accepta voce non adeo culpandi sunt, vel confuderunt latiore cum strictiori significatione. Reuera enim hoc nomen ἑλκωσις est mechanicum, ab ἑλκω, *trabo*, vt ἑλκωσις ab ἑλκόω *ulcero* dictum, vnde ἑλκτικὰ ὄργανα, *machina tractoria* dictæ; apud medicos vero seorsim attrahentia dicta, quæ ἐπιτιθέμενα τῷ δέρματι ἑλκυσιν αὐτὸν, *imposita cuti illam exulcerant*, per gradus æstimanda.

Et hæc ipsa hinc sunt dolorifica, non vna mansione, seu exterius sic adhibita, per mechanicam, seu interne concepta, vnde & tenesmus velut species quædam est doloris, imo & ipse pruritus, suo sensu, & effectû, licet prima fronte, quoad superficiem, quandam quasi titillationem inferat, & præ se ferat.

Est nimirum & hic tristis sensatio, sui generis, eaque ad doloris analogiam, non ἐν ἑξεί, *in habitu*, sed ἐν ᾑρέσει, *in habitudine*. Sed ad quid irritatur, si quæras, omnino non id fit quoad sensum, sed quoad motum, ad excernendum, vno verbo.

CAUSA MEDIATA PROXIMIOR est acrimonia salina rosua, vellicans & stimulans portitorem ordinarium. Hæc ut duplex alias est & assignatur, *humorosa* & *vaporosa*, ita prior illa hic omne absoluit punctum, hæc saltem secundo concurrit & afficit tamen; aliquando vero & *solida*, imo & *positiva* & *priativa*.

Ex humoribus debetur eadem potissimum *bili*, *pituita*, & reliquorum omnium vehiculo, *sero*. Quandocunque enim bilis acrimoniam concipit, rodit & radit intestina in genere, acido cum primis stimulo iuncto. Pituita vero, sibi relicta, veluti domesticam & familiarem defensionem præbet intestinis, maxime recto, & eius sphincteri. Quando vero a bile & sero acrimoniam concipit, & fluxilitatem mutatur, de sede sua deturbatur, & abrasa tunica crustosa, villosa, glandulosa nudantur intestina, eorumque extremum, & maxime ἀκρόπολις, *extrema sedes*, unde stimulus, rasio, nuditas laudata & reliqua consurgunt. Inde enim oscilla vasorum nudata exudant cruorem; ibidem mucus prius dulcis & incrustans, ac obtundens salinum acrem acidum characterem, mordax redditur & hosticus.

Hic vero locus est vitia humorum ordinaria applicare. Pecant enim & hic concurruntque quantitate, qualitate & motu. Si *quantitatem* materiæ appellentis spectemus, quo maior & copiosior appellit, eo etiam magis exercetur longanone; quamdiu vero talis manet, non æque stimulat vel irritat, vel fit τενεσμώδης, nisi adscita qualitate acri, rosua, fermentatiua, biliosa, serosa. Sic lienteria, diarrhoea, fluxus hepaticus sæpius producuntur, neque vllum tamen tenesimum causant, sed velut iure suo utuntur excernenda appellentia, & excernens ac promouens sphincter ani.

Simulac vero acuuntur & morsicantia fiunt magis, vel nudan-

nudantur parietes defensi prius, velo suo & mucilagine destituti, præsto est. Atque hinc plus *qualitate* afficiunt, quam quantitate accessorii humores, exitum & dimissionem exposcentes.

Seorsim hinc ipsa scybala corpus delicti, ut ita loquamur, seu materiale constituunt iisdem titulis. Quando enim quantitate saltim discreta peccant, vel sola frequenti deiectione, liquata & soluta salia secum asportantia, afficiunt assiduitate illa sua, & continuatione sphincterem. Docet id vel ipsa deterfio iterata, quæ sane non minimum confert & suo loco, vnde muco ablato tenerius afficitur vtrinque anus, nedum acrimoniæ extraneæ accessione, iniuria illata, urgente.

Ipsa vero qualitas salina est instar omnium, adeo ut & citra molem, & copiam maiorem, humor morbificus intensius magis, quam extensius exstimulet. Ut in erosione ventriculi, ab acido rosiuo intertriginem inferente, vel minima quantitas vnius vel alterius cochlearis, potulenti, vel medicamenti assumpta, eousque affligit, sentitur molesta, urget, cogit, donec vel tantillum illud, nec *ἄξιον λόγῳ*, excutiat versus *πρὸς ἄνω*, per nauseam & vomitum perquam molestum: ita idem hic quoque licet animadvertere, saltim mutato loco.

Ut cantharides porro assumptæ, quotidiano experimento, eliquatum & communicatum cum sero sal acre, volatile, causticum, salvis omnibus aliis partibus, in vesicæ sphinctere stranguriam cient; ita acrimonia eiusmodi in intestino recto vel concepta, vel illata, irritat & tenesmum producit.

Imo specialius, ut acrimoniam in parte affecta concipere queamus, suppositoria acriora sint exempli loco. Vel solum alumen in suppositorium formatum anoque impositum id satis evincit, ne alia laudemus, inde citato tenesmo.

Adeo.

Adeoque motus humorum laudatorum, acidorum, acrium, falforum, biliosorum, imo ipsius sanguinis, & hic subsistentis, vel per *πνευματισμὸν, ἀσέως καὶ βίαιως*, fluxionem, vehementer & cum impetu, vel per *συνασπίσμὸν* congestionem appulsi, motum sphincteris hunc inordinatum ciet quoque, acrimonia laudata ibi se exerente & sedem figente. Et hinc satis clare potest irritationis huius ulcerantis vis, & gradus non vnus.

Ex solidis vero, præter stercora iam tacta duriora, & ex vermibus *ascarides* potissimum tenesmus illum rosione sua & motu citato inferunt. Dicuntur vero *ascarides* vermiculi minuti in intestino recto potissimum degentes, caseorum vermibus non absimiles, & cum primis puerili ætati familiares, *Aet. tetr. 3. serm. 1. c. 41.* tam propter temperamentum calidum, quam ex usu crebriori lacticiniorum, dulcium, fructuum æstiuorum aliorumque, quibus seminium verminosum corpori inferri potest & solet toto die. Vid. *Fernel. pathol. l. 6, c. 10. p. m. 172.*

Nonnunquam vero ipsi *calculi* quoque, in intestinis geniti, testante id experientia, concurrunt, qualia exempla latius adducere non attinet. Fœmina quædam, alias tumidioris abdominis, inter alias molestias, dolores, inflationes, tumores particulares, & tenesmo laborabat, subinde ab adhibitis medicamentis resoluentibus & calculis excretis per anum.

Ex CAUSIS MEDIATIS REMOTIORIBVS, vtut omnia illa quoque huc concurrere queant, quæ dysenteriam causare; latius tamen & hæc patent, & specialius attingi gestiunt.

Sic, vt illas delibemus ordine, ex NATVRALIBVS facit huc TEMPERAMENTUM tum vniuersale, tum particulare. Et suo modo in singulis, si accedat vel *σφοδρὴς*, vel acrimonia, dispositio

sitio quædam, inde oriri potest maior. Præ aliis vero, quibus biliosum magis obtigit, memorandi sunt, quando bilis copiosior, velut aloe quædam vegetabilis, ad intestina fertur, inuitat vt hæmorrhoides, ita & tenesmum.

Acidum melancholicum ipsum, inprimis melancholiæ secundi generis, quod atrabilarium vocant, prompte cum acido bilioso & seroso nexum idem importat. Imo & pituita salsa hunc censum subit. Atque hinc non solum pituita intestinorum quasi propria salsedinem mordacem stimulantem sortiri potest, sed & ab aliena acrimonia abradi & extrudi. Singulis velificatur intestinorum *ιδιοσυγκρασία*, connata & acquisita, siquidem minimum sint debilia & minus resistere apta.

Quoad ÆTATES assiduus hic conatus frequentius visitur in infantibus & pueris. In illis non solum ob causam communem iam dicendam, verum & quod *ἀρρώστια* quædam *διαβολία*, vrgentiam hanc prosequendam nisu altiori putent. In his vero, tum humiditate ætatis, tum quia plus cibi sumentes pueri nutrimenta sæpe corrumpunt, vnde *εἰκότως*, non mirum, tenesmo corripiuntur, quæ verba sunt *Galen* l. 3. epid. comm. 3. t. 53.

Confirmat idem *Trincavellius*, quando l. 9. de rat. curr. c. 8. p. 250. putris, inquit, acrisque pituita in calidiori ætate congeritur, quæ cum excernenda est, in transitu hærens intestino recto, illudque mordens vlcerat, & irritat.

EX HÆREDITARIA DISPOSITIONE laudari possunt, qui familiæ assuetudine hæmorrhoides pati consuevere, ne de aliis morbis affinibus tenesmum fouentibus dicamus. HABITVS CORPORIS tenuior, rarior & delicatior, vti ad alios morbos, ita & ad tenesmum præ reliquis est proclivis.

Ratione SEXVS in sequiori accedit consensus vteri quo-

C

que

que ipse, non vno modo, vnde promptius inuitatur & periculofior euadit tenesmus.

Inter CAUSAS NONNATVRALES primas tenet AER, siue alterationem massæ sanguineæ & inde variantem respiciamus, siue morbos alios, ad tenesmum comitatum, vel symptomaticum inuitantes. Qualitatibus enim suis etiam primis, præter alias, vel per transpirationem libertate ætheris minus concessa concurrunt. Exemplum tale refertur apud *Forestum* ex *Guainerio* de quodam familiari amico, quod, cum montem *Sinisi* in festis natalibus transisset, pene totus congelatus tenesmum incurrerit. Idem de aëre frigido scribit *Auicenna* l. 3. *Fen.* 16. *tr.* 2. c. 16.

Inter TEMPORA ANNI æstiuus & autumnalis aër diuerso respectu idem præstare potest. Notauit id *Cous* l. 1. *epidem. sect.* 2. t. 17. æstate & autumno lienterias, dysenterias & tenesmos factos. Vid. *Galenus* l. c. in *comm.* t. 7. Indirecte seu mediate idem contingit, si purgante assumpto corpus refrigeretur indebite, seu alui procidentia accidat, vel præcesserit, a frigore tenesmo inuitato, quo de vid. *Höfer. Herc. Med.* Enimuero & neruis & speciatim etiam *ἔδγη, σέδι*, iuxta *5. apb.* 18. & 22. frigus est inimicum.

Consequitur ex dictis ratio, quare & tenesmum inducat refrigeratio podicis & recti intestini, vndecunque facta; quo & spectat sessio nudi podicis super saxum frigidum, aut mora longior in aqua frigida.

Plurimum vero & apprime conferunt ASSVMPTA, non solum alimentosa ceteroquin ipsa, CIBVS & POTVS, sed & medicamentosa & venenosa. Si enim, qualis cibus, talia excrementa, facile patet, quæcunque acrimoniam salinam sulphuream, acidam, biliosam congerere, & accumulare queunt, fructus æstiuus, pruna cerea, pyra, poma, cerasa, melones, cucu-

cumeres, & quæuis alia huius generis, quæ diarrhœam, choleram, dysenteriam producere queunt, vt & τὰ ἀνόμοια σιμιάζοντα, *inaqualia turbatiua*, fermentatiua huc pertinere & symbolum conferre.

Nouimus iuuenem XII. annorum singulis diebus viginti vel triginta pyra & poma comedentem, semper vesperi flagellum suum pro hacce breui voluptate, tenesmm nempe, passum, remittentem tamen habita quiete, raroque ultra quatuor horas durantem, qui tandem abstinentia horum fructuum, præmisso purgante, desit. Simile exemplum iuuenis nobilis recenset *Lelius a Fonte conf. med. 69. p. m. 417.*

Ex potulentis laudanda sunt cereuisia recentior, vel acida quoque, vetustior, feculenta, non bene fermentata. cerevisiæ laxatiuæ, & dulces, mustum, imo & ebrietas a vini vel mulsæ quoque largiori potu, & alia.

Ex medicamentosis huc referenda tum leniora, tum media, tum *degrada, fortiora.* Leniorum exemplum præbent aloetica, vt pilulæ Francofurtenses ipsæ, aliæque similes crebrius assumptæ. Hæ enim continuato vsu, in cholericis, & siccioribus inprimis, acrimonia sua amaricante, gummosa & facile resolubili, & ipsa detergunt facile plus iusto intestina, & bilem illuc citatius accersunt e suis loculis; vnde deterfo muco, nudatis membranis oscula vasorum referant, & tenesmm hæmorrhoidalem inferunt certo certius. Idem valet de elixirio proprietatis ipso.

Ex mediis faciunt huc omnia purgantia media, si largius operentur, vel frequententur fortiori dosi, minus tamen ordinarie, & non nisi in dispositis, vt gummi guttæ v. g. aliaque; inprimis vero pituitosis alias & inuiscatis glutine simili intestinis congrua alioqui optime gummata, galbanum, sagapenum, opopanax,

Ex *δραστικοῖς* esulina, helleborata, colocynthiaca, grana-
tiglia, laureola, euphorbiata, nominasse sufficiat, saluo ta-
men usu moderato & decenti prudenter adhibitorum quan-
doque quorundam, stimuli loco, reliquis hodie fere exo-
letis. Tacemus male præparata, minus correctâ, vel immo-
dica quantitate adhibita, quæ sæpe relinquunt vestigia suæ
qualitatis visceribus malignæ.

Notabilis est observatio *Nicandri*, qui in *Alexiph.* scri-
bit, a doryenio assumpto tenesnum citari, seu intestino-
rum mucum cœnosum effundi,

Τηνεσμῶ δ' ὥσεί τε δυσέντερος ἀχρόνυρος Φῶς.

Vt quem tenesmus miserandaque tormina vexant.

Quod per os remotiori visa via præstant purgantia, idem
proximiori excernere valent suppositoria, vel acriora illa, vel
in podicem nimia vi intrusa, & clysteres acres & plus iusto
refrigerati.

De venenosis assumptis memorat *Platerus loco citato*,
quod pulvis adamantis propinatus dysenteriam & tenesnum
excitauerit. Id quod tamen alii minus concedunt. Cer-
tius est, imo longe certissimum, a venenis mineralibus, vt ar-
senico, mercurio sublimato & similibus idem accidere.
Quidam ædituus cum per errorem ministri hunc sumpsisset,
tantum sensit conatum, vt etiam anus misero exprimeretur,
mortemque oppeteret.

SOMNVS & QUIES diuturnior, humorum otiosorum mater;
VIGILIE omnigenarum cruditarum parentes vel verbo lau-
dari merentur.

MOTVS vero citatior succussatorius & continuatus afflu-
xum ad anum promouere, vel intertriginem quoque & ni-
sum ad excernendum inuitare potest.

EX ANIMI PATHEMATIBVS huc faciunt suo modo metus, mœror & tristitia, de quibus eleganter scribit *Sylvius*: *Omnes humores redduntur glutinosiores mœrore*. Sed vt hi quietiores & minores videntur affectus ad motum hunc prouocandum; ita maioris momenti est ira. Visi sunt, præsertim in sequiori sexu, dicta temperie præditi, simul iræ fermentum turbatiuum, velut fomitem quendam, concepere, breui post ad tenesimum & diarrhœam ipsam concitari.

Agmen claudunt ex hisce EXCERNENDA RETENTA, & RETINENDA EXCRETA. Vt mensium & transpirationis insensibilis, aliarumque consuetarum excretionum retentione staceamus, vel sola aluus, priuata quasi culpa, modo laxior huc facit, iuncta falsedine & acrimonia quacunque: modo adstrictior.

Enimuero ex stercore indurato, indeque concurrente suo nisu coactiuo, ex vitio bilis, succi pancreatici, aut potulentorum defectu, vel deficiente intestinorum motu peristaltico, oriri quoque tenesmus assolet, quo de vid. *Christ. Iob. Langius in praxi med. c. 6. p. m. 23*. Talem historiam rustici ex induratione fecum in tenesimum decidentis recenset & *Forestus l. 22. obs. 40*. & *Hollerius l. 1. c. 41*.

EX CAUSARVM PRÆTERNATVRALIVM classe quam plures memorandæ se offerunt. Sic tenesmus velut ex malo ouo gignitur in febribus putridis malignis & pestilentialibus, metastasid facta aliquando humoris illius putris maligni & venenosi ad intestina, de qua vid. *Vidius tom. 3. l. 9. c. 24*. *Platerus in praxi med. tom. 3. c. 11*.

Ex iisdem morbis intemperiei maxime causat eundem inflammatio ani vndecunque orta, seu intestinis reliquis communicatione ad eum facta, seu propria & locali culpa.

Frequentissime vero sequitur dysenteriam, quam velut

individuus comes stipat, sæpe parili si non maiori molestia affligens, tenesmus, quam fluxus & tormina ipsa, non concessa mora, quiete, & interuallo. Et ipsa iam dicta inflammatio extremæ sedis etiam a dysenteria visa est, eamque grauiorem & funestam magis reddit; & citra hanc stimulus communis sæpe etiam male curatam dysenteriam excipit, fluxu scilicet bilioso retento, stimulante, quod studiose notaverunt *Forest. l. c. & Hollerius l. 1. c. 44. p. m. 354.*

De Cholera tenesimum producente egregius extat locus apud *Aretæum*, ubi in recensendis cholerae phænomenis & accidentibus: cholera, scribit, *conatus ad vomendum perpetui ac inanes fiunt, inclinatio ad deiciendum prompta, quam τεινισμός Græci vocant, sicca tamen nihilque succi egerens.*

Plura præterea apud autores prostant exempla tenesimi per consensum orti, ab obstructione v. g. stercoris coacti in intestino cæco *Aet. l. 9. c. 43. calculo vesicae*, præsertim si colum obsideat, quo de vid. *Pathol. dogm. Wedelii Sect. 3. c. 12. p. 654. ab hæmorrhoidibus, fistulis, rhagadibus ani, Ioel. l. 4. f. 3. Iob. Zecchius cons. med. 37. Ebn sina l. 3. fen. 7. tr. 2. c. 16. A tumore uteri, & vasorum seminalium Sennert. prax. l. 3. p. 2. f. 2. c. 12. p. m. 414. A stranguria Paon. & Pythagor in exercit. Anat. med. 13. p. 63. A rugitibus aliisque flatibus, & partu difficili ipso, Holler. l. 1. c. 44. A dolore colico, Forest. l. 22. obs. 43. Amatus Lusitan. l. 3. curat. 44. Ab inflammatione parastatarum Mercat. l. 3. c. 13. p. m. 299.*

Sunt, qui tenesimum etiam deriuant a pituita spumosa acri, in catarrhis acribus ex capite ad ventriculum & intestina defluente, quem fluxum cerebralem vocant, ut *Vid. Vid. tom. 3. l. 9. c. 24. & Plater. in praxi tom. 3. c. 11. p. m. 802.*


De calculo intestinorum iam diximus, extraordinarie magis & præternaturaliter ibi genito. Neque obstat, quosdam

dam id non vidisse, vt *Galen. l. 6. c. 2. de loc. affect.* scribit: *quidam scripserunt, lapides ex intestinis exiisse, quod tamen neque ipse vidi, nec qui viderit, audiui adhuc quenquam. Confer. Paul. Aeginet. l. 3. c. 41.*

CAPVT IV.

De

Differentiis.

D complendam tenesmi notionem DIFFERENTIÆ quoque eiusdem sunt visendæ; ita enim intimius patebunt omnia, & aditus ad dignotionem, prænotationem & curationem sternitur.

Ratione GENERIS alius est *incipiens*, qui mitior, alius *perfectus* & exquisitus. Alius *verus*, qui causam sui intestino affixam tenet, alius *mendosus*, cum materia non est fixa, sed aliunde veniens, quo de *Forestus l. 22. obs. 40.* Alius est *brevis*, alius *productus*.

Ratione CAUSARVM alius est *essentialis*, alius *per consensum*. Alius *hemorrhoidalis*, qualis ab aloeticis, vel etiam citra ea communissime fit, *Ebnsina l. 3. fen. 7. tr. 2. c. 16.* alius *dysentericus*, tum a priori, quem sequitur dysenteria, vt præter *Coum Trallianus* testatur; tum a posteriori, qui dysenteriam. Alius *nephriticus*, qui a calculo vesicæ cumprimis oritur. Alius denique *hystericus*, affecto scilicet, & irritato recto intestino ex consensu vteri. Sic & alius tenesmus est a causa *interna*, alius ab *externa*, alius ab *humorosa*, alius *vaporosa*, qualem ex colico dolore notatum iam laudauimus.

Ratione TEMPORIS alius est *constans*, alius *interpolatus*,
horis

horis præsertim vespertinis recrudescens; *Lael. a Font. conf. 69. p. 417.* Ratione MORIS alius est *benignus*, alius *malignus*, *pestilentialis*, quem lethalem pronunciat *Val. de Tarant. l. 4. c. 35.* Alius *gangrenosus*, seu inflammatorius grauior.

Tenesmus vero differt a dysenteria (1.) *loco*; huius enim subiectum sunt omnia intestina, tam tenuia, quam crassa; illius tantum intestinum rectum. (2.) *Excretionem & sensationem*; in dysenteria multa egeruntur, in tenesmo nulla, vel pauca; in illa quoque tormina, tensio & grauitas, sed longe minor ac in tenesmo, *Galen. l. 3. de sympt. c. 2.* (3.) *Causis*, dysenteria fit ab acrimonia fermentifica, & rosua febrili indefinita, tenesmus a minori, & particulari, vt alia non laudemus.

CAPVT V.

De

Signis diagnosticis & prognosticis.

Empiricorum est citra SIGNA curare, cum primis eos affectus, qui velut per se patent. Sed cum signa etiam generalia differant specialibus circumstantiis, neque solum genus, sed & subiectum & causas declarent, merito curationi ipsi sunt præfigenda tam diagnostica, quam prognostica.

Ratione GENERIS ESSENTIALITER INHÆRENTIA optime recenset diuinus *Senex*, quæ verbis ipsius exprimemus ex *l. ὡς παθ. c. 27. t. 1.* Primum est *egestio*; *Ἀγχώρεσι*, inquit, *αἷμα καὶ μύξα, secedit sanguis & mucus.* Consistit in egestione, saltim intentata, si non mole, tamen virtute, distinctus hinc ab omnibus aliis fluxibus. Id vt exprimeret, *Ἀγχώρησι* nominat solum. Vt vero & materiale nominaret, si quid exeat, non alui

alui feces vocat, sed duo alia, primo sanguinem, deinde mucum. Idque notanter saltim alterutrum, non coniunctim, sed vel sanguis, vel mucus secedit.

Dum vero nihil aliud addit, innuit, parce & paucius id fieri, vt vel nihil quoque, vel guttæ sanguinis per se, vel exiguo stercori immixtæ prodeant, vel deiectio, seu cruenta, pauca & tincta, seu mucosa saltim. Vel nihil secedit, & hoc vel illud aliquid si nominandum, præter tantillum stercoreis, sanguis & mucus.

Id vero alibi exprimit *l. de fistul. c. 3. t. 1.* vbi de inflammatione intestini recti agens eleganter: καὶ ἐς ἀφόδον, inquit, γαμινὰ κατίζει, καὶ μηδὲν ὑποχωρεῖ, & frequenter ad exonerandam aluum desidet, & nihil egerit. Et sanguinolenta quidem exeunt exigua fere, reſeratis osculis vasorum ab acrimateria, vel vlceratione ipsa.

Alterum ab ipso memoratum est πόνος, dolor, labor, nisus coactiuus, conatus & implacabilis desidendi cupiditas, cum vel sine flatibus, eaque vrgens & repetens, mouens non promouens.

Tertium locale speciatim est, καὶ μάλιστα ὅταν ἐς ἀφόδον ἔλθῃ, & maxime vbi ad secessum denenerit. Quo ipso indigitat, dolorem incipere cum nisu, & intendi, quando ad exituram venit, repetendo priora, vt, quando egerere intendit, & liberationem sibi spondet sphincter, quasi de nouo idem iterum iterumque repetatur. Quasi dicat, verbis *Celsi*, frequens desidendi cupiditas est, æque dolor vbi aliquid excernitur.

Inter POST-ESSENTIALIA tenesmi signa recenseri merentur vigiliæ, inquietudines, molestia fatigans, stranguria, proſidentia ani, & hæmorrhoides, febris item aliquando ipsa, sitis, pulsus celer, aliaque inflammationi communia, vt colicam,

licam, si tenesmus a ventositate, dolorem iliacum, singultum ipsum taceamus, quæ tamen rariora.

Signa SVBIECTI, an per essentiam vel consensum tenesmus fiat, & CAUSARVM, patefaciunt actiones læsæ aliarum partium concurrentes. Parum abest, quin commodissime videantur applicari posse differentię lassitudinis spontaneæ ad tenesmum. Alia enim dicebatur ἐλκώδης, *ulcerosa*: alia Φλεγμονώδης, *inflammatoria*; alia τενώδης, *tensiva*, a diuersa sensatione diuersam causam & afficiendi modum arguentes, affinia singula.

Singulæ conueniunt tenesmo, ulcerosa v. g. debita, falsæ acidæque pituitæ, inflammatoria sanguini, tensiva partim singulis, partim bili, vel simplici, vel atræ quoque.

Ita porro cognoscuntur humores pituitosi & visceri ex grauatiuo dolore, egestionem mucosam & subcruentam, acres & biliosi ex dolore magis acuto & erosionem fortiori: ascari-des morsu & deiectione vermium, feces induratae ex tensione & pondere quodam premente, aluique excrementis plane retentis: inflammatio ex siti, febris, ut & dolore, & excrementis saniosis, alia ex sibi solennibus signis & symptomatibus.

Et sic non solum tactu, sed & visu & colore hæc patefieri queunt, albore pituita, flauedine & viriditate bilis, rubore sanguis, vlcus pure & ichore se manifestat, & sic porro elucent notæ excretorum & loci affecti.

IN PROGNOSI SALVTIS & MORTIS, ratione GENERIS, dolorificus est affectus & molestus, quo de *Galen. l. 3. epid. comm. 3. t. 53.* legi potest. Dolorificus propter tensionem, τάσεις ὄντας σφαλεράς, *tensiones vehementes vocat. ibid. l. 1. comm. 2. t. 36.* molestus, quod assidue desidendum. Attamen communi quasi consensu sibi relictus non est lethalis. Ita *Cous l. c.* fit qui-

quidem, ait, ex iisdem, quibus & dysenteria, verum debili-
 or & brevis, καὶ ὁ θανάσιμος, & non letalis.

Galenus item l. 5. de vs. part. c. 4. refert affectum hunc inter
 morbos infimi ventris & intestinorum grauissimos quoque, sed
 periculo aliis, dysenteriae, ileo, non parem. Consentit Cel-
 sus l. 4. c. 18. leuius, inquiens, est aliis malum, sed neque acutis,
 neque longis morbis annumerari debet, cum & facile tollatur,
 nec vnquam per se iugulet.

Variat tamen id ex circumstantiis, quamuis enim non
 per se adeo timendus sit, per accidens tamen, concurrentibus
 symptomatibus aliis grauior aestimandus merito: Hinc recte
 Sennertus: periculosus est affectus, quia non leuia symptomata
 & mala saepe secum trahit.

Deteriorem sic reddunt CAUSAE, quae quo grauiores, eo
 grauior affectus. Ita grauior est ab inflammatione oriundus,
 vt & ab atrabile, qui quasi cancrum exulceratum aemulatur,
 teste Sennerto & Riuerio l. 10. prax. c. 7. Vltorius a bile & hu-
 moribus acribus grauior est, quam pituitosus, facile in dy-
 senteriam transiens, quod peius fere est, quam si dysenteriae
 superueniat.

LONGITVDO & BREVITAS variat, prout chronicis vel a-
 cutis symptomatibus iungitur, eademque producit. Si enim
 vrgeat nimis conatus, consequitur non raro ani prociden-
 tia, inprimis in pueris, vtroque nomine tædiosior, quod hi
 remedia ferre recusant, in senibus ob debilitatem & vappe-
 scentes magis humores, quibus ordinarie longiores morbi
 esse assolent.

Imo & alia quae excitant tenesimum, eundem & conse-
 qui assolent, vt ipsa inflammatio, partus difficilis, & vteri
 ὀδαξισμός. Seorsim ob nisum & pressionem maiorem, in de-
 bilioribus inprimis & dispositis, causare potest abortum, ef-

fato 5. aphor. 27. *Si ingrauidata mulieritenesmus supervenerit, abortire eam facit*; accedente consensu & connexione intima partium vicinarum, vteri, & vesicæ quoque.

Symptoma denique non vnum periculosiorem minitatur tenesimum, singultus v. g. diutius durans, nec periculo vacantem diximus tenesimum dysenteria atque febris coniunctum. Idem valet de illo, qui molestis torquet vigiliis, & quandoque in tabem, febrim hecticam ægros coniicit, teste *Forest. l. 22. obs. 40.* sic & grauior est, qui stranguriam secum vehit & inflammationem intestini, *elogio 5. apb. 58.* Taceamus tenesimum a ventositate transeuntem in ileon, colicam, cephalalgiam grauissimam, syncopen ipsam, notante hoc *Val. de Tarant. l. 4. c. 35.* Quod si negligatur, etiam in vlcus sordidum, imo ani fistulam degenerare aptus natus est, quæ symptomata omnia euentum infeliciorem prædicunt, & præ se ferunt.

Contra ea bene sperare iubent symptomata remissiora, & tenesmus quasi solitarius, nec inueteratus, præsertim si ægroti bene comedant. Quod si hinc excretis reliquis, quolibuscunque demum interponantur, verbis *Celsi l. c.* ex cibo quoque recte coacta, & sic *παρασπον* denotantia, id optimum signum est morbi cito desituri. Et hic MODVS EVENTVS est longe optimus.

Sin peiora illa perdurent & vrgeant, seu acuti generis, vt inflammatio gangrænosa, seu chronici, ad mortem terminari solent, vel commori. Referri huc potest tenesmus senilis T. Pomponii Attici, qui cum primitus per tres menses sine vllis doloribus fuisset, grauioribus puta, subito tanta vis morbi in vnum intestinum prorupit, vt extremo tempore per lumbos fistula eruperit, vnde indies dolores increuere, & febris accessit, lethalis futura per se, nisi ipse in ediam sibi indixisset, vnde alleuari visus pertinaciter occubuit.

CAPVT VI.

De

Curatione.

T in aliis morbis curandis, ita & in tenesmo METHODO MEDENDI, tanquam cynosura, opus est, qua sine vel inanis, vel incerta, vel noxia quoque est CVRATIO.

Quamobrem innixa INDICATIONIBVS demonstratiuis opus est. CVRATORIA tollendam irritationem præcipit, urgentem ἀφορῶν. PRÆSERVATORIA acrimoniam & stimulum quemcunque remouendum, qui irritationem frustraneam fouet & promouet. VITALIS tum vires attendit cuiuscunque partis, tum, si quæ adsit, urgentiam, cum primis inflammationem, ex acutis, ex chronicis fistulam, & alia.

VENÆSECTIO ordinarie nec tenesmo, nec sociatis, vel productis inde morbis quadrat, vel opus est, si inflammationem grauiorem exceperimus, in qua reuellendi, deriuandi vel euacuandi fine aliquando est indicatio. Idem valet in fluxu immodico hæmorrhoidum, vel defectu quoque ipso, pro renata, & hoc fine oportet, inquit *Ebn sina l. 3. fen. 16. tr. 2. c. 16. ut curetur initio sui cum phlebotomia, si necessarium fuerit.*

Idem dixerimus de succedaneis SCARIFICATIONIBVS blandis extremorum, LIGATVRIS & FRICTIONIBVS, aliisque, non temere tamen & promiscue adhibendis.

Sic etiam si inflammatio, inquit *Riuerius prax. l. 10. c. 7.* post venæsectionem perseueret, & stranguriam generet, apertio admotis HIRVDINIBVS fiat hæmorrhoidalium venarum, quod remedium iam vsitatum felici cum successu fuit *Amaro Lusitano Cent. 6. cur. 84.*

E Fonte PHARMACEVTICO indicationibus satisfaciunt EVACVANTIA & ALTERANTIA. Ad priorem classem pertinent EMETICA, præcipue si materia peccans sit in primis viis, humoresque vel biliosi, acres, vel visceri & pituitosi, breui manu, quod aiunt, sic euacuari amant.

Confirmari hoc potest elegantissimo loco *Hippocratis l. de affect. c. 28. t. 5.* vbi ab emetico (inprimis hodie leniori) *παρὰ χεῖρα*, scribit, ἀναπαύεται ἀπὸ τῆς κατὰ τὸν ἄφροδος, *confestim sursum reuelltur infernus secessus.* Exemplum habet *Renalmus obs. 7.* vbi aurum vitæ commendat in tenesmo & dysenteria, modo id ad leges methodi medendi fiat.

Idem valet de PURGANTIBVS, si v. g. fiat a repletionem & saburra intestinorum; si moueant stimulantia, non promoueant, si scybala indurata sint, & aliis casibus. Sed selectu opus est vt indicantium, ita & indicatorum: profunt enim magis pro re nata leniora, seclusis fere aloeticis, eaque humectantia, minus *δεξιὰ, μετὰ, fortiora & violenta*, sed temperatiora & media, *rhabarbarina, sennata & similia.* Ita enim non timenda sunt etiam in fecibus induratis, ne passio iliaca vel mors ipsa sequatur, quo de vid. *Guainer, de flux. tr. 5. c. 2. Fuchsius tr. 3. l. 3. c. 18. p. m. 119.*

Ita etiam vnico purgante tenesimum curatum videas, quale exemplum habet & *Grulingius Cent. 1. cur. 33. de viro XL. annorum*, qui a tribus hebdomadibus passus erat tenesimum, quotidie nimirum octies stimulo urgente, sed irritò plerumque conatu, parum vel nihil excernente, scybala alba, liquida & mucosa, præuiis semper torminibus, cum flatibus permixtis. Hunc curauit nodulus ex aperientibus cum *rhabarbaro & foliis sennæ*, infusis cum vino absinthite.

Tutissimum remedium & euacuandi & emolliendi, non minus ac abstergendi & demulcendi sine, in tenesmo existunt

CLTSTERES, non solum quia immediate ad partem affectam penetrant, & maxime fecibus induratis subueniunt; sed & quia, citra virtutem euacuandi, pro differentia ingredientium, leniunt, detergunt, consolidant & calefaciunt, quibus ferme omnes tenesmi indicationes absoluuntur.

Satisfaciunt huic scopo rad. *alb. lil. alb. malu. glycyrrh. herb. branc. vrsin. mercurial. s. aperient, flor. verbas. chamem. s. Rom. melil. sem. lini, fœni grec. psyll. cydon. bord. mund. oryza, furfur. lupin. sebum hircin. ceruin. mel, sacch. ol. chamem. lil. alb. hyosc. electuar. lenitiu. diaphœn. vitell. ouor.* Polychrestum est lac, tam solum, quam cum vitell. ouor. ne lac amygdal. dulc. & cremorem hordei laudemus.

Idem dictum esto de variantibus iisdem aliis ingredientibus, vnde huc referri possunt etiam traumatica, adstringentia & alia similia temperantia, quæ largius huc conferre & enumerare non opus est. Clysterem vocat mirabilem Hartmannus in *praxi chimiatri*. ex iure veruecino, cum olei cera guttis aliquot iniectum, cuius loco Michaelis verbasum iungit.

Memorari hic possunt clysteres quoque sicci, ex fumo tabaci, Anglorum inuento, constantes, in tenesmo quoque, & dysenteria, præter alios casus, commendati, & experimento probati, quo de vid. *D. Valentini Polychrest. Exot. diss. 5. §. 4. p. 72.* Siccandi minimum usu concedendi fuerint, quamuis minus vsitati.

EX DIAPHORETICORVM classe huc pertinent, quæ diuersioni causarum tenesmum fouentium & continentium debentur, vt *ῥευματισμῶ* vel *συναρτηρισμῶ*, inflammationi, dysenterix & diarrhœis, ab acribus, venenosis, malignis, purgantibus oriundo stimulo. Inter hæc laudem merentur temperata, fixa, alcalina terrea, absorbentia, mucilaginosa, vt
terra

terra sigillata, Turcica, Lemnia, bolus armena, C.C. philos. prepar. tium & le cachecticum, pulu. cordialis Anglicus, lapis bezoar vterque, natiuus & artificialis.

Inter selectiora bezoardica, præter laudata, locum tuentur *Ra bezoard. ~ theriac. campb. theriaca Androm. cœlest. mitbridatium, Oruiet. Aqua flor. sambuc. cinam. cydon. cord. H.S. fr. elect. diascord. Fracast. unic. ver. & fossil. rad. contrayerv. pulv. bezoard. pannon. ruber, C.C. phil. succin. aliaque, pro intentione medici & variationis gratia, in mixturis, potionibus, electuariis, bolis & pulueribus propinanda.*

Ex DIVRETICIS *succinata, lapides cancrorum, semen lycopodii & similia; ex compositis essentia lithontriptica, elixir nephriticum, minus vero, citra alium respectum, acida, nitrosa vel alcalica, vel fortiora pellentia ex usu esse queunt. Vti enim stranguria & tenesmus in formali & sæpe materiali ipso quoque conueniunt, ita aliquando iisdem remediis curantur.*

Præcipua sunt ALTERANTIA & ROBORANTIA SPECIFICA reliqua. Hæc vero vt indicationibus distinctis & determinatis debentur, ita quoque non possunt esse vnius eisdemque commatis. Licebit hinc in genere commendare respectiue, seligenda facile a medicæ materiæ perito, & speciatim applicanda suis causis, non solum iam tacta bezoardica, sed & v. g. aperientia, adstringentia & resoluentia, anthelmintica, visceribus variis congrua, carminatiua, & κατ' ἐξοχήν ἐπινεργούντα, quæ acrimoniam & mordacitatem humorum obtundunt, parietes firmant, demulcent & sanant, incrasantia ipsa.

Ex INTERNIS, vt pauca quædam delibemus, laudari possunt *rad. althææ, gumm. tragacantha, sanguis draconis, terra Iaponica, masticbe, eiusque oleum, ad aliquot guttas cum*

cum *aqua mentha*, *plantaginis*, *cinam. cydon.* exhibitum, quod inprimis *Hartmanno l. c.* laudatur, quod subito tenesmum soluat.

Cera ipsa, iam olim a *Dioscoride* dysentericis commendata, hinc & aliis, vt *Valeriola l. 2. obs. 4.* in pomo, præcipue cydonio, excauato cocto diffusa & cum eo assumpta ante omnem cibum, laudem meretur.

Sic & conueniunt *dens hippopotami* philos. præparat. *bolus armen. crySTALLUS montana* rite præpar. *lapis sapphirus*, *corallia rubra*, imo *cortex china* & *chaquerilla*, *cinnabaris natua*, *cornu cerui* & *ebur* vltum quoque, *puluis stypticus*, & ex his composita varia alia; item *essentia traumat. carminat.* Ræ *Mles temperata*, *corallior.* &c.

Colophonem addunt *opiata* ipsa, debito modo præparata, reliquis combinanda, saltem refracta dosi, vel media quoque, pro diuersis vrgentis doloris gradibus, ad refrenandos spiritus ferocientes, & humores acres serofos, acidos, biliosos, vt *extractum* & *essentia anodyna*, *pil. de cynoglossa*, *de styrace*, ne theriacalia ipsa repetamus.

Nec EXTERNA, seu TOPICA præsidia, ad leuandum & tollendum tenesmum sunt de nihilo, variantia itidem pro peccantis causæ modulo. Ita fodus fieri possunt ex *verbasco*, eiusque floribus, *malua*, *althæa*, *herba paridis*, *hyoscyamo*, *scrophularia*, *linaria*, *chamamelo* c. t. *semine lini* conquassat. fl. *papau. rb. ocul. popul.* cum lacte inprimis coctis & applicatis, seu vaporetenus, seu sacculis partitis applicatis.

Ita *tapsum barbatum* cum vino decoctum & applicatum pro experto habet *Petr. Paul. Pereda l. de curand. morb. l. 1. c. 28.* *Plinius Secundus l. 3. c. 17.* commendat *allium* ex pulvere coctum, & de eodem *Æmilius Macer l. de herbis c. 4.* canit:

Adiuuat incoctum pulti sumptumque tenesmon.

Cum *aceto* vero parati foci minus fere sunt congrui, qualis est ab *Aëtio* commendatus, ex latere antiquo puluerisato, & cum *aceto* subacto, reiectus proprio experimento a *Lotichio l. 4. c. 8. obs. 11.* Interim *folia quercus* in eiusmodi decoctis quoque non inepte iunguntur, pro tono partis affectæ simul quodammodo roborando, præcipue quando pro-cidentia ani imminet vel coniungitur.

SUFFRITVS tum ex iisdem confieri possunt, uti & *suffimentum de verbasco Mynsichti* satis egregium est, tum ex *colophonio, gummi anime, iuniperi, mastiche, thure, & aliis*

Et *BALNEA* ipsa paregorica ac inessus huc referri possunt, sed rariora magis, neque ita commoda, vel frequentanda. Constant ex communi cum clysteribus materia, *rad. symphyti, alcb. herbis & flor. malue, althææ, verbasco. violar. sem. lini* conquassat. *ocul. populi &c.*

LINIMENTA & VNGVENTA quoque memorari possunt. Blandiora ex *ol. lilior. albor. ouor. recenti, hyoscyami* rite parato, ipsoque aliquando *petroleo*, ut in ascaridibus, nulla inflammatione præsentem eximium ferunt opem. Illa tamen præsentem res maioris est momenti, neque externis æque tollenda. Ipsa vero olea paregorica, hæc vel illa, lumbis, umbilico, abdomini, hypogastrio quoque illini possunt, præsentibus doloribus præsertim.

Sic & ex *cerussa, pomphol. magister. sacch. hni sem. lycopod. mucilagine gumm. arab. tragac. cydon. cum ol. symphyti & aliis vnguenta* fieri queunt. Tacemus & *sebum ceruin. & hircin.* longe temperatiora, præ suillo, si usus ita ferat, eadem illis miscendi & applicandi.

Optima est, loco amuleti seu appendicis, *radix telephii* recens, quæ gestata in linteamine, probato effectu, non

non solum hæmorrhoidum dolorem compescit, sed & extra illum temperat loci intemperiem, & laxitatem, ac tensionem occultam quasi, ipsamque ani procidentiam arcet.

Quod SUPPOSITORIA attinet, omne quidem suppositum ano vel dilatatione sua illum stimulare potest: attamen si acrimonia rosua maior sit & dolorifica, intertrigo, vlcus ipsum, vel fistula quoque malum foueat, possunt & ipsa blandius afficientia concedi aliquando.

Ita in tenesmo dysenterico grauius infestante, & dolore in ano molesto balanum præscribit *Valeriola l. c. ex myrrha, croci, styracis calamita* ā ʒi *opii* ℥ii *bdellii, aloes* ā ʒ℥. *cere citrinæ liquefactæ q. s.* Fiant balani, quorum vno in anum indito, sedatus confestim est dolor, & tenesmus remisit.

Sunt, quæ in formula hac desiderari possint, nihilominus vero transire potest, & experientia vna plus sæpe valet quam plures rationes. Alias enim si de aloe nihil dicamus, cum vsus internus & externus eius differat, & nonnulli etiam inter vnguenta ad tenesmum recipiant, *opium* largiori dosi noxam inferre potest. Ita, teste *Guainerio* quidam ex *opii* ʒii. *tbur. gumm. arab.* ā ʒi. suppositoio ab empirico præscripto mortuus legitur; adeoque hæc non temere imitanda.

Singulis hisce pondus addit DIÆTÆ regimen accommodum. In VITALI AER sit temperatus, ad calidum magis vergens, frigus vero omne vitandum sollicitè, tum in genere, tum maxime a loco affecto arcendum, defendendo & fouendo.

In NATVRALI CIBVS in quantitate sit sufficiens; siquidem hic morbus, quod *Hippocrates* asserit, plures cibos expetit; cum enim ab inanitione magis fiat, cibis suggestis minorem mordacitatem inferunt humores. In qualitate sit *εύχυμ*, καὶ *εύπεπν*. Vitanda sunt acida, acria, salsa, fermenti-

36 DISSERTATIO INAUGURALIS MEDICA DE TENESMO.
mentifica, leguminosa, flatulenta, oleracea, præterquam in
alui obstructione, fructus æstivi & autumnales.

Pisces saxatiles concedendi, & imprimis ex his *gobius*
fluviatilis. Elegans de hoc est locus apud *Simon. Setbi l. de*
alim. facult. p. 61. Si, inquit, sine sale assus edatur, ἰᾶται δυ-
σεντερίας καὶ λειεντερίας, καὶ τὰς τενεσμώδεις πρῶτονίαις, curat
dysenterias, lienterias & frustratam desidendi cupiditatem,
seu tenesimum.

Cereuisia sit probe defecata, non recens, nec acidior.
Vini & lactis vsus variat pro circumstantiarum, febris, diar-
rhœæ, hamorrhoidum, calculi &c. modulo.

IN ANIMALI QVIES & SOMNVS cordi habeantur;
MOTVS corporis & ANIMI citatior cauendus. EXCRETA
moderanda ad εὐφορίαν, cui πέψις alimentorum
& πεπασμός excrementorum velifi-
cantur.

SOLI DEO GLORIA.

SI Cereris videas & Bacchi nectare lætos,
Torquentes epulas noris & hæce fore.
Quisque suam secum matulam gerit atque latrinam,
Ante retroque oritur nomine utroque dolor.
Tu reparas portas quassas solamine certo;
Vnde Tibi laudes noster Aperta parat.

Nobiliss. Dn. Doctorando
Honoris, Affectus & faustæ Gratu-
lationis ergo scrib.

PRÆSES.